

Na osnovu člana 9., 10. i 12. Zakona o udruženjima i fondacijama Bosne i Hercegovine («Službeni glasnik BiH», br. 32/01, 42/03 i 63/08) Osnivačka skupština udruženja Nacionalni komitet ICOMOS u Bosni i Hercegovini, na sjednici održanoj dana 25.09.2008. godine u Sarajevu, donijela je

**STATUT  
UDRUŽENJA NACIONALNI KOMITET ICOMOS  
U BOSNI I HERCEGOVINI**

*(izmijenjen odlukom broj a-ETJ-40-15/19 od 12.04.2019.godine, koja se odnosi na izmjenu Člana 22. tačka 3.; izmijenjen odlukom a-ETJ-40-16/19 od 12.04.2019.godine koja se odnosi na izmjenu Člana 4. tačka 1.)*

*(izmijenjen odlukom broj a-ETJ-40-4/22 od 15.03.2022.godine, koja se odnosi na izmjenu Člana 17. tačka 2.; Člana 20. tačka 1.; Člana 21.; Člana 24.)*

## **I OPĆE ODREDBE**

### **Član 1.**

Udruženje Nacionalni komitet ICOMOS u Bosni i Hercegovini, (u daljem tekstu: Udruženje) je osnovano Odlukom o osnivanju na sjednici Osnivačke skupštine održane dana 25.09.2008. godine u Sarajevu, u skladu sa Zakonom o udruženjima i fondacijama Bosne i Hercegovine (u daljem tekstu: Zakon).

### **Član 2.**

Ovim Statutom, u skladu sa članom 12. Zakona, uređuje se:

- naziv udruženja i sjedište Udruženja;
- ciljevi i djelatnosti Udruženja;
- znak Udruženja
- postupak za primanje i isključivanje članova;
- organi Udruženja, način na koji se biraju, ovlaštenja koja imaju, kvorum i pravila glasanja, trajanje mandata, osoba ovlaštena za sazivanje Skupštine, uvjeti i način raspuštanja, odnosno prestanak rada;
- pravila za ostvarivanje, korištenje i raspolaganje sredstvima Udruženja, kao i organ koji je ovlašten za nadzor nad korištenjem tih sredstava;
- način podnošenja finansijskog izvještaja i izvještaja o radu;
- javnost rada;
- postupak za izmjene i dopune Statuta udruženja, ovlaštenje i način donošenja drugih općih akata;
- opis oblika i sadržaj pečata;
- zastupanje i predstavljanje Udruženja;
- uvjeti i postupak za pripajanje, razdvajanje, transformaciju ili prestanak rada Udruženja;
- postupak za raspolaganje preostalim imetkom ili drugim sredstvima u slučaju raspuštanja ili prestanka rada Udruženja i

- druga pitanja od značaja za organizaciju i djelovanje Udruženja.

## **II NAZIV, SJEDIŠTE I PODRUČJE NA KOJEM UDRUŽENJE DJELUJE**

### **Član 3.**

Naziv Udruženja je:

Udruženje Nacionalni komitet ICOMOS u Bosni i Hercegovini

Udruga Nacionalni komitet ICOMOS u Bosni i Hercegovini

Удружење Национални комитет ИЦОМОС у Босни и Херцеговини.

Naziv Udruženja na engleskom jeziku je: Association ICOMOS National Committee in Bosnia and Herzegovina

### **Član 4.**

Sjedište Udruženja je u Sarajevu, Jovana Bijelića 8/4.

### **Član 5.**

Udruženje je neprofitabilno, nevladino, nezavisno, dobrovoljno, vanstranačko Udruženje.

Udruženje djeluje na cijeloj teritoriji Bosne i Hercegovine.

## **III PEČAT I ZNAK UDRUŽENJA**

### **Član 6.**

Udruženje ima znak i pečat.

Znak Udruženja je u obliku globusa. Simbolizira planetu Zemlje sa stiliziranom naznakom meridijana i paralela. Na desnoj strani Zemljinog eliptoida dominira lik krilatog konja prikazanog u profilu. Crne je boje.

Pečat je okruglog oblika, promjera 4 cm, i uz rub pečata je upisan tekst koji glasi: Udruženje Nacionalni komitet ICOMOS u Bosni i Hercegovini, na sva tri službena jezika, a u sredini pečata se nalazi znak udruženja i sjedište Sarajevo.

## **IV CILJEVI I DJELATNOST UDRUŽENJA**

### **Član 7.**

Ciljevi, odnosno djelatnosti Udruženja su:

- Međusobno povezivanje stručnjaka u cilju promoviranja, zaštite, konzervacije, restauracije, revitalizacije i prezentacije kulturno-historijskih spomenika, ansambala i spomeničkih cjelina u Bosni i Hercegovini;
- Učešće u implementiranju projekata zaštite i kritički osvrt na projekte i realizacije

- u cilju zaštite stručnosti u očuvanju kulturno-historijskog naslijeđa u Bosni i Hercegovini;
- Učešće u znanstvenim istraživanjima kulturno-historijskih spomenika, ansambala i spomeničkih cjelina u Bosni i Hercegovini;
  - Razmjena iskustava i informacija sa drugim udruženjima i nevladinim organizacijama;
  - Izdavanje knjiga, brošura, publikacija i letaka radi ostvarivanja ciljeva društva;
  - Organiziranje skupova, održavanje seminara, okruglih stolova i debatnih klubova i radionica u cilju usavršavanja stručnjaka;
  - Promoviranje kulturno-historijskog naslijeđa u Bosni i Hercegovini i postignuća u njegovoj obnovi s ciljem podizanja svijesti o značaju potrebe očuvanja i zaštite graditeljske baštine u Bosni i Hercegovini;

## V ČLANSTVO

### Član 8.

Članstvo u Udruženju je dobrovoljno.

Osnivači stječu svojstvo člana Udruženja danom registracije Udruženja.

Svojstvo člana Udruženja mogu steći fizička lica, državljani Bosne i Hercegovine, i pravna lica koja djeluju u oblasti zaštite, restauracije, obnove i revitalizacije kulturno-historijskog naslijeđa u Bosni i Hercegovini.

### Član 9.

Članovi Udruženja mogu biti:

- stalni
- pridruženi
- počasnici

### Član 10.

Stalni članovi Udruženja su lica iz člana 8. stav 3. ovog Statuta koja neposredno učestvuju u radu Udruženja.

Pridruženi članovi pristupaju Udruženju radi sudjelovanja u realizaciji ciljeva Udruženja.

Počasnici članovi su lica koja značajno, materijalno ili na drugi način, pomažu rad Udruženja, bez prava na glasanje. Počasni članovi sudjeluju u radu Udruženja savjetodavnom funkcijom.

Pridruženi i počasnici članovi mogu biti pojedinci i pravna lica.

### Član 11.

Prava i dužnosti članova Udruženja su:

- da biraju i budu birani u organe Udruženja;
- da aktivno učestvuju u svim djelatnostima Udruženja;
- da budu blagovremeno informirani o radu i svim aktivnostima Udruženja;

- da razmatraju i ocjenjuju rad organa Udruženja;
- da pokreću pitanje odgovornosti i opoziva članova Udruženja;
- da prisustvuju svim skupovima, da daju prijedloge, postavljaju pitanja i traže odgovore;
- da ostvaruju određena prava i pogodnosti, u skladu s odlukama i drugim aktima Udruženja;
- da se pridržavaju odredaba ovog Statuta;
- da čuvaju ugled Udruženja;
- da neposredno učestvuju u radu Skupštine Udruženja;
- da surađuju sa ostalim članovima Udruženja;
- da uredno plaćaju članarinu.

Članovi u Udruženju su ravnopravni u ostvarivanju prava i dužnosti.

### **Član 12.**

Članstvo u Udruženju prestaje:

- dobrovoljnim istupanjem iz Udruženja;
- isključenjem iz Udruženja, zbog narušavanja ugleda Udruženja ili nepridržavanja odredaba Statuta;
- gubljenjem svojstva pravnog lica;
- neplaćanja članarine;
- prestankom rada Udruženja

### **Član 13.**

Svaki član udruženja može dobrovoljno istupiti iz Udruženja na osnovu pismene izjave o istupanju koju dostavlja Predsjedniku Udruženja.

Kao dan prestanka članstva u Udruženju smatra se datum prijema izjave o istupanju.

### **Član 14.**

Član Udruženja koji grubo krši Statut Udruženja, ne izvršava svoje obaveze prema Udruženju ili svojim postupcima nanosi štetu Udruženju ili narušava ugled Udruženja može biti isključen iz Udruženja.

Prije donošenja odluke o isključenju, član Udruženja mora biti pismeno obaviješten o prijedlogu za isključenje, kao i razlozima zbog kojih se predlaže isključenje.

Odluku o prestanku svojstva člana Udruženja donosi Predsjednik Udruženja.

Član koji je nezadovoljan odlukom iz prethodnog stava, može podnijeti žalbu Skupštini Udruženja u roku od 15 dana od dana prijema odluke.

Skupština Udruženja razmatra žalbu iz prethodnog stava na prvoj narednoj sjednici.

Odluka Skupštine po žalbi je konačna.

### **Član 15.**

Udruženje može imati svoje urede, kancelarije ili druge organizirane oblike izvan sjedišta, na cijelom području Bosne i Hercegovine. Odluku o otvaranju ureda donosi Skupština i utvrđuje način njihovog rada.

## **VI ORGANI UDRUŽENJA**

### **Član 16.**

Organi Udruženja su:

1. Skupština
2. Predsjednik Udruženja

### **1. SKUPŠTINA**

#### **Član 17.**

Skupština Udruženja je organ upravljanja Udruženja koju čine svi članovi sa jednakim pravom glasa.

Radom Skupštine rukovodi Predsjednik Skupštine kojeg bira i razrješava Skupština udruženja, u skladu sa Statutom. Predsjednik Skupštine može biti razriješen i prije isteka vremena na koje je imenovan/a:

- na osobni zahtjev;
- ako pravilno ne obavlja poslove i zadatke Predsjednika Skupštine;
- u drugim slučajevima predviđenim Zakonom i ovim Statutom.

Inicijativu za razriješenje Predsjednika Skupštine može dati 1/3 članova Skupštine.

Mandat Predsjednika Skupštine traje tri (3) godine s mogućnosti reizbora.

#### **Član 18.**

Skupština se sastaje po potrebi, a najmanje jednom u toku kalendarske godine.

Skupštinu saziva predsjednik Skupštine, najkasnije 15 dana prije njenog zasjedanja.

Predsjednik Skupštine dužan je sazvati vanrednu skupštinu u slučaju kada to zahtijeva najmanje 2/3 članova Udruženja.

#### **Član 19.**

Skupština radi i odlučuje u skladu sa Statutom i Poslovníkom o radu i kvorum je natpolovična većina svih članova Skupštine Udruženja.

Skupština punovažno odlučuje natpolovičnom većinom prisutnih članova Skupštine.

#### **Član 20.**

Radom Skupštine rukovodi Predsjednik Skupštine.

Predsjednik Skupštine obavlja slijedeće:

- Stara se o organiziranju Skupštine i saziva njene sjednice,
- Predlaže dnevni red sjednice,
- Predsjedava sjednicama Skupštine,
- Potpisuje akte donesene na Skupštini,
- Stara se o izvršavanju odluka, zaključaka i drugih akata Skupštine,
- Vrš i druge poslove koje mu odredi Skupština u skladu sa Zakonom i ovim statutom.

Predsjednik Skupštine u slučaju spriječenosti prisustvovanja Skupštini može pismeno ovlastiti člana Udruženja koji će ga zamijeniti u obavljanju poslova upravljanja radom skupštine.

## **Član 21.**

Skupština udruženja:

- donosi Statut, izmjene i dopune Statuta i druga opća akta Udruženja određena Statutom;
- odlučuje o pripajanju, razdvajanju, transformaciji, raspuštanju i prestanku rada Udruženja, kao i drugim statusnim promjenama u Udruženju;
- usvaja godišnji program i plan rada Udruženja;
- donosi financijski plan i usvaja izvještaj o izvršenju financijskog plana Udruženja;
- imenuje predsjednika Udruženja, i razmatra izvještaj o radu koji je podnio predsjednik;
- utvrđuje programske ciljeve Udruženja;
- donosi odluku o ovlaštenom licu za zastupanje i predstavljanje Udruženja;
- odlučuje o visini i načinu plaćanja članarine;
- odlučuje o žalbama članova u drugom stepenu;
- odlučuje o svim drugim pitanjima koji nisu u nadležnosti drugih organa Udruženja.
- imenuje predsjednika Skupštine, i razmatra izvještaj o radu Skupštine koji je podnio predsjednik Skupštine;

## **2. PREDsjedNIK UDRUŽENJA**

### **Član 22.**

Poslovima i aktivnostima Udruženja upravlja Predsjednik Udruženja, kojeg imenuje i razrješava Skupština, u skladu sa Statutom.

Predsjednik Udruženja je odgovoran Skupštini i može biti smijenjen, u skladu s ovim Statutom.

Mandat Predsjednika Udruženja traje tri godine, sa mogućnosti reizbora.

### **Član 23.**

Predsjednik Udruženja može biti razriješen i prije isteka vremena na koje je imenovan/a:

- na osobni zahtjev;
- ako pravilno ne obavlja poslove i zadatke Predsjednika Udruženja;
- u drugim slučajevima predviđenim Zakonom i ovim Statutom.

Inicijativu za razriješenje Predsjednika Udruženja može dati 1/3 članova Skupštine.

### **Član 24.**

Predsjednik Udruženja obavlja slijedeće:

- zastupa i predstavlja Udruženje u pravnom prometu;
- odgovoran je za zakonitost i poslovanje Udruženja;
- organizira redovno obavljanje djelatnosti Udruženja;
- nastupa u odnosima s trećim stranama, javnim i privatnim;
- priprema budžet koji dostavlja Skupštini na razmatranje i usvajanje;
- priprema godišnji program i plan rada koji dostavlja Skupštini na razmatranje i usvajanje;
- povjerava posebne poslove pojedinim članovima;
- izvršava odluke i zaključke Skupštine;
- priprema izvještaj o svom radu i aktivnostima Udruženja i podnosi Skupštini na razmatranje i usvajanje;
- održava stalne kontakte s javnošću i promovira ciljeve Udruženja;
- prati realizaciju financijskog plana Udruženja;
- obavlja i druge poslove utvrđene ovim Statutom i odlukama Skupštine Udruženja.

## **VII NAČIN STICANJA, KORIŠTENJA I RASPOLAGANJA SREDSTVIMA UDRUŽENJA I NADZOR**

### **Član 25.**

Imovinu Udruženja čine: prava, stvari i novac, koje Udruženje stiče u skladu sa Zakonom i ovim Statutom.

Za obaveze prema trećim licima Udruženje odgovara cjelokupnom imovinom.

### **Član 26.**

Prihodi Udruženja:

- članarine;
- dobrovoljni prilozi i pokloni javnih institucija, fizičkih i pravnih lica, kako inozemnih tako i domaćih, u gotovini, uslugama ili imovini bilo koje vrste;
- državne subvencije i ugovori sa javnim institucijama, fizičkim i pravnim licima, kako domaćim tako i inozemnim;
- prihodi od kamata, dividendi, dobiti od kapitala, zakupnina, honorara i sličnih izvora pasivnih prihoda;
- prihodi stečeni kroz ostvarivanje ciljeva i aktivnosti Udruženja u skladu sa zakonom i Statutom Udruženja;

- sredstva dobivena iz općinskih, kantonalnih, federalnih i državnih izvora.

#### **Član 27.**

Udruženje ima svoj žiro-račun preko kojeg obavlja poslovanje.

Udruženje je dužno voditi evidenciju o imovini u skladu s općeprihvaćenim računovodstvenim principima i sastavljati financijske izvještaje u skladu sa zakonom.

Sredstva Udruženja mogu se koristiti isključivo za ostvarivanje ciljeva i zadataka predviđenih Statutom Udruženja.

#### **Član 28.**

Ostvarivanje, korišćenje i raspolaganje sredstvima Udruženja utvrđuje se finasijskim planom, kojeg donosi Skupština, na prijedlog predsjednika Udruženja.

O upotrebi(korišćenju) sredstava, u skladu sa finasijskim planom , odlučuje Predsjednik Udruženja.

#### **Član 29.**

Nadzor nad korištenjem sredstava Udruženja vrši Skupština.

Skupština je nadležna za kontrolu svih dokumenata, koji se odnose na financijsko poslovanje.

Dokumenta iz prethodnog stava Skupština razmatra na redovnoj godišnjoj, a po potrebi na vanrednoj sjednici Skupštine.

### **VIII ZASTUPANJE I PREDSTAVLJANJE**

#### **Član 30.**

Udruženje zastupa i predstavlja predsjednik Udruženja u granicama utvrđenim zakonom i ovim Statutom.

#### **Član 31.**

U postupcima u kojima Udruženje sudjeluje kao stranka radi ostvarivanja svojih prava, dužnosti i odgovornosti pred nadležnim organima, predsjednik Udruženja može dati pismenu punomoć za zastupanje advokatu ili drugom stručnom licu.

### **IX JAVNOST RADA**

#### **Član 32.**

Rad Udruženja je javan.

Javnost rada Udruženja ostvaruje se neposrednim informiranjem i putem sredstava javnog informiranja.

#### **Član 33.**

Organi Udruženja su dužni ovlaštenim predstavnicima sredstava informiranja učiniti dostupnim podatke, informacije i isprave koje se odnose na rad Udruženja.

#### **Član 34.**



Članovi Udruženja imaju pravo biti redovno informirani o radu Udruženja, o čemu se stara predsjednik Udruženja.

## **X OPĆI AKTI UDRUŽENJA**

### **Član 35.**

Pored Statuta, Udruženje može donositi i druge opće akte i to:

- odluke,
- pravilnike i
- poslovnike.

Opći akti Udruženja moraju biti u skladu sa Zakonom i Statutom Udruženja.

### **Član 36.**

Odluke kao opći akti, donose se u slučajevima kada je to izričito utvrđeno Zakonom i ovim Statutom, kao i u drugim slučajevima kada se na opći način uređuju pitanja od značaja za ostvarivanje ciljeva Udruženja.

### **Član 37.**

Pravilnikom se uređuju odnosi između članova Udruženja, kao i međusobni odnosi organa Udruženja u ostvarivanju njihovih nadležnosti.

### **Član 38.**

Poslovníkom se bliže uređuje način rada organa Udruženja.

### **Član 39.**

Originalni primjerci općih akata Udruženja čuvaju se u arhivi Udruženja.

## **XI IZMJENE I DOPUNE STATUTA**

### **Član 40.**

Inicijativu za izmjene i dopune Statuta može podnijeti svaki član Udruženja.

Inicijativa se podnosi Predsjedniku Udruženja pismenim putem i s odgovarajućim obrazloženjem.

Utvrđeni prijedlog dostavlja se Skupštini, najmanje 30 dana prije održavanja sjednice Skupštine.

### **Član 41.**

O izmjenama i dopunama Statuta odlučuje Skupština 2/3 većinom svih članova skupštine Udruženja.

Predsjednik Skupštine potpisuje odluku o izmjenama i dopunama Statuta koji se smatraju originalima i čuvaju u arhivi udruženja.

## **XII STATUSNE PROMJENE UDRUŽENJA**

### **Član 42.**

Udruženje se može transformirati u drugo udruženje.

Udruženje može donijeti odluku o prestanku svoga rada.

Odluke iz stava 1. i 2. ovog člana donosi Skupština Udruženja dvotrećinskom većinom članova Skupštine.

## **XIII PRIPAJANJE, RAZDVAJANJE, TRANSFORMIRANJE**

### **Član 43.**

Udruženje se može razdvojiti ili transformirati samo u drugo udruženje ili fondaciju u skladu sa Zakonom.

Odluku iz prethodnog stava donosi Skupština 2/3 većinom svih članova skupštine Udruženja.

Ovom odlukom regulira se naziv, sjedište udruženja, te podjela imovine, prava i obaveze, kao i druga pitanja koja se odnose na statusne promjene Udruženja.

## **IX PRESTANAK RADA UDRUŽENJA**

### **Član 44.**

Udruženje može prestati sa radom dobrovoljno, na osnovu odluke Skupštine udruženja ili po sili Zakona.

Odluku o dobrovoljnom prestanku rada udruženja Skupština donosi 2/3 većinom glasova svih članova Skupštine udruženja.

Incijativu za prestanak rada Udruženja može dati 1/3 članova Udruženja u slučaju:

- ako se broj članova smanji ispod broja tri određenog za osnivanje Udruženja,
- ako je proteklo dvostruko više vremena od vremena održavanja Skupštine utvrđenog ovim Statutom, a Skupština nije održana,
- u drugim slučajevima utvrđenim Zakonom.

Incijativa se podnosi predsjedniku Udruženja, koji priprema materijal za Skupštinu udruženja.

### **Član 45.**

Udruženje prestaje sa radom po sili Zakona u skladu sa odredbama člana 51. i 52. Zakona.

Udruženje je obavezno svaku statusnu promjenu prijaviti ministarstvu u roku od 30 dana od dana nastale promjene u skladu sa Zakonom.

### **XIII PRAVILA ZA RASPODJELU IMOVINE U SLUČAJU PRESTANKA RADA UDRUŽENJA**

#### **Član 46.**

Istovremeno sa odlukom o prestanku rada Udruženja Skupština donosi plan likvidacije Udruženja, kojim se utvrđuje raspored imovine, prava i obaveze Udruženja.

Skupština imenuje likvidatora Udruženja čija dužnost je da se stara o izvršenju Plana likvidacije i koji je ovlašten da zastupa Udruženje u postupku likvidacije i u postupku podnošenja zahtjeva za prijavu prestanka rada Udruženja nadležnim organima.

Imovina kod raspuštanja udruženja, nakon izmirenja svih zakonskih obaveza, dodijelit će se nekom drugom udruženju koje obavlja iste ili slične djelatnosti, a na osnovu odluke Skupštine udruženja.

### **XIV PRELAZNE I ZAVRŠNE ODREDBE**

#### **Član 47.**

Tumačenje odredaba ovog Statuta daje Skupština Udruženja.

#### **Član 48.**

Ovaj Statut stupa na snagu danom usvajanja na Osnivačkoj skupštini Udruženja, a primjenjivat će se od dana upisa u Registar kod nadležnog ministarstva.

U Sarajevu, 15.03.2022. godine  
Broj: a-etj-40- 8/22

**PREDSJEDNIK UDRUŽENJA**

.....  
Elša Turušić Jurić